

Convocatoria da Dirección Xeral de Ordenación e Innovación Educativa, no contexto do PLAN LÍA de Bibliotecas Escolares (*Lectura, Información e Aprendizaxe*), do proxecto “Radio na biblio”, para a introdución da radio nas bibliotecas escolares dos centros que matriculan alumnado de educación infantil, primaria, educación secundaria obrigatoria, bacharelato ou formación profesional integrados no Plan de mellora de bibliotecas escolares, para o curso 2022/2023.

A Lei Orgánica 2/2006, de 3 de maio, de Educación, modificada pola Lei orgánica 3/2020, do 29 de decembro, de Educación, establece, no seu artigo 1, como un dos principios básicos que inspira o sistema educativo, o fomento e a promoción da investigación, a experimentación e a innovación educativa.

O artigo 113 da devandita Lei fai unha mención específica ás bibliotecas escolares sinalando que os centros de ensinanza disporán dunha biblioteca escolar, engadindo que estes recursos educativos contribuirán a fomentar a lectura e a que o alumnado acceda á información e outros recursos para a aprendizaxe das demais áreas e materias, e poida formarse no uso crítico dos mesmos, debendo contribuír estas bibliotecas escolares a facer efectivos os principios pedagóxicos referidos á lectura.

As bibliotecas son, pois, instrumentos dos centros educativos ao servizo das competencias clave e como tales poden albergar propostas moi diversas que favorezan o desenvolvemento de contidos curriculares de forma transversal ou interdisciplinaria, que conecten distintas áreas de aprendizaxe, que impulsen prácticas metodolóxicas activas e faciliten, así, a adquisición destas competencias clave, incluída a competencia dixital no seu máis amplo significado.

Especificamente, as bibliotecas escolares teñen entre os seus obxectivos o de favorecer a alfabetización múltiple, un concepto que desenvolve, amplía e actualiza o concepto de lectura, tal e como se entendía ata o momento, e que aparece recollido no documento de referencia do Consello da Unión Europea (2012): *Conclusiones do Consello, de 26 de novembro de 2012, sobre alfabetizacións múltiples. DOUE*.¹ Defínese a alfabetización múltiple como a “comprensión, utilización e avaliación crítica de diferentes formas de información, incluídos os textos e imaxes, escritos, impresos ou en versión electrónica”, abundando en que esta “competencia é esencial para a vida” e que “é a porta cara ao resto das aprendizaxes”.

A Consellería de Cultura, Educación, Formación Profesional e Universidades continúa no seu Plan LÍA 2021/2025 de Bibliotecas Escolares co

¹ <https://eur-lex.europa.eu/LexUriServ/LexUriServ.do?uri=OJ:C:2012:393:0001:0004:ES:PDF>



desenvolvemento de novos ámbitos de actuación para este período, contemplando o reforzo dos programas que inciden na *Alfabetización mediática e informacional* do alumnado como *Radio na biblio* con propostas que promovan o coñecemento e un uso responsable da información en múltiples formatos.

A posta en marcha dunha emisora de radio nun centro educativo proporciona múltiples oportunidades para o desenvolvemento de competencias clave a través de tarefas complexas que involucran diversas habilidades e destrezas, permitindo o tratamento de contidos curriculares mediante metodoloxías activas, como veñen demostrando diversas experiencias diseminadas polo territorio galego. A radio ten demostrado a súa potencialidade no ámbito educativo con anterioridade, pero as actuais tecnoloxías da información e da comunicación facilitan a súa utilización como ferramenta pedagóxica de gran alcance. Sumadas as posibilidades da radio á biblioteca escolar configurada como “centro creativo das aprendizaxes”), poden xerar unha importante dinámica de comunicación, de apoio aos proxectos do centro, de difusión dos produtos culturais e das investigacións elaboradas polo alumnado. Cando a biblioteca incorpora un “laboratorio de radio” pode, así mesmo, impulsar novos proxectos de carácter interdisciplinario, vinculados á educación para as competencias en información e medios.

Tras cinco convocatorias do programa “**Radio na biblio**” e a súa implantación en **138** centros educativos, obsérvanse excelentes resultados pola motivación que supón este medio para o alumnado e as oportunidades que abre para as bibliotecas á hora de ampliar e diversificar o tipo de proxectos colaborativos ou de actividades de carácter interdisciplinario que poden deseñar, cun enfoque comunicativo e de reforzo das competencias clave como horizonte.

De acordo co anteriormente exposto esta Dirección Xeral,

RESOLVE:

Apartado 1. Obxecto

1. Estimular o desenvolvemento do modelo de biblioteca cara a “centros creativos de aprendizaxes” e promover a creación de emisoras/laboratorios de radio no contexto destas bibliotecas escolares co fin de favorecer proxectos de educación das competencias informacionais e mediáticas do alumnado.
2. Búscase, así mesmo, ampliar as linguaxes presentes na biblioteca, promover a expresión oral, a alfabetización múltiple e o traballo colaborativo de



profesorado e alumnado. O laboratorio de radio na biblioteca escolar poderá estar asociado a un programa de voluntariado na biblioteca, no caso de que o equipo docente así o decida.

Apartado 2. Destinatarios

1. Seleccionaranse **30 bibliotecas escolares** para a súa participación no Proxecto “Radio na biblio” durante o curso 2022/2023.
2. Poderán participar neste proxecto bibliotecas de centros públicos non universitarios de titularidade da Consellería de Cultura, Educación, Formación Profesional e Universidades, integrados no Plan de mellora de bibliotecas escolares durante o curso 2022/2023 que matriculen alumnado de ensino infantil, primaria, educación secundaria obrigatoria, bacharelato ou formación profesional. Non poderán participar os centros que se incorporan ao PLAMBE en 2022, pois no primeiro curso dentro do programa cómpre centrar a actividade na consolidación do modelo de biblioteca segundo os obxectivos presentados no seu proxecto, naqueles aspectos que son esenciais (xestión técnica, coidado da colección, melloras en mobiliario e equipamentos, deseño de actividades e programas de lectura e de educación en información, entre outras).

Apartado 3. Financiamento

1. Os centros seleccionados recibirán contías destinadas á posta en marcha do proxecto e das actuacións que supoña (nas que se inclúe a realización dun obradoiro de formación para o alumnado que se considere), por un máximo de 2.000 euros cada centro (tendo en conta que se poderá reservar para a formación un máximo do 40% do total da asignación).
2. Os 138 centros integrados xa no programa, deberán solicitar a súa continuidade, se así o deciden, e recibirán (cando a memoria de actividades do curso anterior acade unha valoración positiva) unha asignación de 500 euros por centro, para a realización de obradoiros de formación específica, en materia técnica para o funcionamento da emisora de radio, a elaboración de producións radiofónicas ou o desenvolvemento de competencias mediáticas a través da radio; tamén poderán versar sobre lectura expresiva ou mellora da expresión oral. Estes obradoiros estarán destinados ao alumando que o centro decida.
3. A través da aplicación orzamentaria 10.30.423A.640.10, do orzamento da Consellería de Cultura, Educación, Formación Profesional e Universidades, destinada a programas de atención á biblioteca escolar para o ano 2022,



asignaranse as contías correspondentes por un máximo global de 129.000 €.

Apartado 4. Solicitudes e prazos

Os centros do Plan de mellora de bibliotecas escolares interesados en participar nesta iniciativa deberán presentar a súa solicitude, a través da persoa responsable da dirección do centro, no enderezo:

<https://edu.xunta.gal/programasbibliotecas/>

Aqueles centros que soliciten o reingreso no programa “Radio na biblio” na presente convocatoria, pero xa tivesen formado parte do programa e causado baixa anteriormente por diferentes razóns, poderán ser seleccionados sempre que acaden a valoración suficiente e sempre que transcorrese un mínimo de catro anos desde a data da baixa.

O prazo para a presentación de solicitudes para nova incorporación ou para continuidade, será de quince días a partir do día seguinte ao da publicación da presente convocatoria no portal educativo

Apartado 5. Requisitos e compromisos do centros e profesorado participante

- a) Os centros interesados deberán estar integrados no Plan de mellora de bibliotecas escolares no curso 2022/2023, coa excepción de aqueles centros que se incorporan ao PLAMBE en 2022, tal como se recolle no apartado 1, punto 3 desta convocatoria.
- b) A persoa responsable da biblioteca en cada centro deberá coordinar e garantir a integración desta iniciativa na programación anual da biblioteca escolar, coa colaboración imprescindible do equipo de biblioteca ou doutro profesorado do cadro docente.
- c) Os centros comprométese, no caso de resultaren seleccionados, a contribuír coas súas valoracións á elaboración dun informe, por parte da Asesoría de bibliotecas escolares, sobre as posibilidades que ofrece un laboratorio de radio vinculado á biblioteca escolar.



Apartado 6. Criterios de selección

Os criterios de selección serán os que seguen:

- Valoración acadada pola memoria da biblioteca do pasado curso 2021/2022 terán prioridade aqueles centros que presentan unha actividade media-alta.
- Localización: tendo en conta o anterior, procurarase unha distribución equilibrada polo territorio galego; ademais, un mínimo dun terzo das prazas dispoñibles destinaranse a centros situados en concellos de ámbito rural.
- No caso dos centros de continuidade, valorarase a memoria de actividades do proxecto “Radio na biblio” no curso 2021/2022, que deberá resultar positiva, así como a memoria do Plan de mellora de bibliotecas escolares, tamén do curso 2021/2022.

Á vista desta proposta da comisión a Dirección Xeral de Ordenación e Innovación Educativa resolverá a convocatoria. Esta resolución será publicada por esta Dirección Xeral no Portal Educativo e comunicada por correo electrónico a todos os centros solicitantes.

Apartado 7. Comisión de valoración

Baixo a presidencia da Subdirectora Xeral de Ordenación, inclusión e Innovación Educativa ou persoa en quen delegue, constituirase unha comisión integrada polos seguintes membros:

- A Subdirectora Xeral de Ordenación, inclusión e Innovación Educativa ou persoa en quen delegue
- A xefa do Servizo de Innovación e Programas Educativos
- As persoas asesoras responsables da Asesoría de bibliotecas escolares na Dirección Xeral de Ordenación e Innovación Educativa. Unha delas fará as funcións de secretaria.

Apartado 8. Resolución provisional

1. A comisión de selección, unha vez avaliadas as solicitudes presentadas, emitirá unha resolución provisional coa selección de **30 centros** para a participación neste programa, así como a proposta de continuidade dos centros que o soliciten. Esta resolución provisional poderase consultar na web desta consellería (<http://www.edu.xunta.gal/portal/>).



2. Logo da publicación da resolución provisional abrírase un prazo de 5 días hábiles para efectuar reclamacións ou renuncias ante a presidencia da comisión. As reclamacións ou renuncias dirixíranse á Consellería de Cultura, Educación, Formación Profesional e Universidades, Dirección Xeral de Ordenación e Innovación Educativa e presentárase obrigatoriamente por medios electrónicos na Sede Electrónica da Xunta de Galicia (<http://sede.xunta.gal>) a través do formulario correspondente ao procedemento de presentación electrónico normalizado (código PR004A) que se deberá identificar coa denominación **“Radio na Biblio”**. Para a presentación de solicitudes poderán empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de clave Chave365 (<http://sede.xunta.gal/tramites-e-servizos/chave365>).

Apartado 9. Resolución definitiva

1. Transcorrido este prazo, a comisión de selección realizará a valoración das reclamacións e renuncias recibidas, e elevará a proposta definitiva á persoa titular da Dirección Xeral de Ordenación e Innovación Educativa, que adoptará a resolución definitiva dos centros participantes, tanto de nova incorporación como de continuidade.
2. As alegacións ou reclamacións serán aceptadas ou rexeitadas na resolución definitiva que se publicará no portal educativo <http://edu.xunta.gal/portal/>.
3. Contra esta resolución, que non esgota a vía administrativa, poderase interpoñer recurso de alzada ante a persoa titular da consellería no prazo dun mes contado a partir do día seguinte ao da publicación desta resolución no portal educativo, segundo o disposto nos artigos 121 e 122 da Lei 39/2015, do 1 de outubro, do procedemento administrativo común das administracións públicas ou ben directamente o recurso contencioso administrativo ante a Sala do Contencioso-Administrativo do Tribunal Superior de Xustiza de Galicia, no prazo de dous meses, de conformidade co artigo 46 da Lei 29/1998, do 13 de xullo, reguladora da xurisdición contencioso-administrativa.
4. O prazo máximo para resolver este procedemento será de tres meses. Se transcorrese o citado prazo sen que recaese resolución expresa, as persoas interesadas poderán entender desestimadas as súas solicitudes por silencio administrativo.



Apartado 10. Desenvolvemento do proxecto.

As bibliotecas seleccionadas programarán, segundo o seu contexto, a posta en marcha do laboratorio de radio, no seu caso, así como a formación que se inclúe no proxecto para o alumnado que o equipo de biblioteca propoña e, tamén, a integración desta iniciativa na programación xeral da biblioteca. Os centros contarán co apoio da Asesoría de bibliotecas escolares, que orientará o seu desenvolvemento e poñerá á súa disposición recursos de apoio, así como propostas de posibles relatorios, entre as que os centros deberán elixir á vista da documentación remitida, co fin de garantir que a formación sirva ás finalidades do programa.

Apartado 11. Avaliación da participación no programa.

As bibliotecas participantes deberán entregar ao finalizar o curso, unha breve memoria das actividades desenvolvidas (máximo de 2 páxinas e até 5 imaxes anexas). Así mesmo, achegarán unha produción sonora elaborada polo alumnado no contexto do proxecto “Radio na biblio”, acompañada dunha descrición do proceso debidamente documentado (contexto, contido, tarefas, guión, participantes...), para a súa difusión nun espazo web específico que se creará a tal efecto.

O prazo para a presentación da memoria e dos materiais aos que fai referencia o apartado 3 punto c) desta convocatoria, rematará o **10 de xullo de 2023**. Xunto coa memoria entregárase unha xustificación económica segundo o modelo que se facilitará previamente. Toda esta documentación deberá remitirse a través do seguinte enderezo:

<https://edu.xunta.gal/programasbibliotecas/>

Coa mesma data cubrirase o formulario web para recoller datos de valoración do proxecto que lles será remitido, coas instrucións pertinentes (se fose o caso), desde esta Dirección Xeral (Asesoría de bibliotecas escolares).

Apartado 12. Difusión das experiencias

Os materiais elaborados pasarán a ser propiedade da Consellería de Cultura, Educación, Formación Profesional e Universidades, conservando a autoría dos seus creadores, co fin de servir como exemplo de boas prácticas, para o que deberán ser publicados cunha Licenza Creative Commons CC BY-NC-SA



Creative Commons CC BY-NC-SA

Permítese o uso non comercial da obra e das posibles obras derivadas, a distribución das cales debe facerse cunha licenza igual á que regula a obra orixinal.



As bibliotecas integradas en “Radio na biblio” deberán sinalizar os espazos destinados ao laboratorio de radio co logo do programa, que lles será remitido desde esta Dirección Xeral; así mesmo, na difusión das actividades desenvolvidas deberán indicar a participación neste proxecto da Consellería de Cultura, Educación, formación Profesional e Universidades.

Disposición adicional única. Información básica sobre protección de datos persoais

1. Os datos persoais recadados neste procedemento serán tratados na súa condición de responsable pola Xunta de Galicia, Consellería de Cultura, Educación, Formación Profesional e Universidades, coas finalidades de levar a cabo a tramitación administrativa que se derive da xestión deste procedemento.
2. O tratamento dos datos baséase no cumprimento dunha misión de interese público ou no exercicio de poderes públicos, conforme á normativa aplicable e as referencias recollidas en <https://www.xunta.gal/informacion-xeral-proteccion-datos>.
3. As persoas poderán acceder, rectificar e suprimir os seus datos, así como así como exercer outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/proteccion-datos-persoais>.
4. No caso de existir diferentes referencias normativas en materia de protección de datos persoais neste procedemento, prevalecerán en todo caso aquelas relativas ao Regulamento (UE) 2016/679, Xeral de Protección de Datos ou a Lei Orgánica 3/2018, de 5 de decembro, de Protección de Datos Persoais e garantía dos dereitos dixitais.

Santiago de Compostela, na data da sinatura dixital

A Directora Xeral de Ordenación e Innovación Educativa

Judith Fernández Novoa



ANEXO I
Proxecto “Radio na biblio”. Curso 2022/2023
DATOS DO SOLICITANTE

Nome do Centro		Código	
Enderezo			
Concello	C.P.	Tfno.	e-mail
Responsable da Biblioteca Escolar:			
<input type="radio"/> Nome: <input type="radio"/> e-mail: <input type="radio"/> DNI:			
<input type="radio"/> INCORPORACIÓN		<input type="radio"/> CONTINUIDADE	<input type="radio"/> RENUNCIA
<i>A presentación desta solicitude implica o compromiso cos requisitos contemplados na convocatoria</i>			
<p>Don/Dona, como director/a do centro, solicita a participación no proxecto “Radio na biblio” para a introdución da radio na biblioteca escolar, da Consellería de Cultura, Educación, Formación Profesional e Universidades para o curso 2022/2023, co fin de ampliar as linguaxes presentes na biblioteca, no contexto das alfabetizacións múltiples e, tamén, de favorecer proxectos de educación das competencias informacionais e mediáticas do alumnado. Así mesmo, garante que as contías que se lle asignen, no seu caso, como resultado da participación neste proxecto, dedicaranse ás finalidades contempladas no mesmo, segundo as propostas do equipo de biblioteca, acordes coas orientacións da consellería.</p> <p>En a de de 2022</p> <p>Asdo.:</p>			
Proxecto “Radio na biblio”			SOLICITUDE

Data límite de solicitude: un mes contado a partir do día seguinte ao da publicación da presente convocatoria no portal educativo

(A solicitude será presentada pola dirección do centro a través do formulario dispoñible no enderezo: <https://edu.xunta.gal/programasbibliotecas/>)

